



KENYATAAN MEDIA JABATAN ALAM SEKITAR

LAPORAN STATUS KUALITI UDARA DAN JEREBU DALAM NEGARA

JAS memandang serius perkembangan kualiti udara semasa dan terus memperkukuh pemantauan serta tindakan di lapangan selaras dengan Pelan Tindakan Jerebu Kebangsaan (PTJK) dan Arahan NADMA No. 1: Dasar dan Mekanisme Pengurusan Bencana Negara.

Indeks Pencemar Udara (IPU) yang direkodkan di laman sesawang Jabatan Alam Sekitar pada jam 1 tengah hari ini menunjukkan sebelas (11) kawasan mencatatkan status kualiti udara pada tahap baik, dua puluh enam (26) kawasan mencatatkan status kualiti udara pada tahap sederhana, **dua puluh lima (25) kawasan mencatatkan bacaan IPU pada tahap tidak sihat dan enam (6) kawasan mencatatkan bacaan IPU pada tahap sangat tidak sihat pada hari ini, iaitu:**

SANGAT TIDAK SIHAT

- 1) Samalaju, SARAWAK (IPU - 202)**
- 2) Bintulu, SARAWAK (IPU - 201)**
- 3) Sri Aman, SARAWAK (IPU - 251)**
- 4) Samarahan, SARAWAK (IPU - 242)**
- 5) Kuching, SARAWAK (IPU - 267)**
- 6) IPD Serian, SARAWAK (IPU - 287)**

TIDAK SIHAT

- 1) Nilai, NEGERI SEMBILAN (IPU - 154)**
- 2) Seremban, NEGERI SEMBILAN (IPU - 151)**
- 3) Alor Gajah, MELAKA (IPU - 152)**

- 4) Bukit Rambai, MELAKA (IPU - 157)**
- 5) Segamat, JOHOR (IPU - 155)**
- 6) Batu Pahat, JOHOR (IPU - 157)**
- 7) Kluang, JOHOR (IPU - 153)**
- 8) Larkin, JOHOR (IPU - 154)**
- 9) Pasir Gudang, JOHOR (IPU - 141)**
- 10) Kota Tinggi, JOHOR (IPU - 106)**
- 11) Rompin, PAHANG (IPU - 126)**
- 12) Balok Baru Kuantan, PAHANG (IPU - 151)**
- 13) Kota Kinabalu, SABAH (IPU - 155)**
- 14) Kumanis, SABAH (IPU - 168)**
- 15) Labuan, W.P. LABUAN (IPU - 168)**
- 16) Limbang, SARAWAK (IPU - 160)**
- 17) ILP Miri, SARAWAK (IPU - 189)**
- 18) Miri, SARAWAK (IPU - 182)**
- 19) Mukah, SARAWAK (IPU - 188)**
- 20) Kapit, SARAWAK (IPU - 151)**
- 21) Sibu, SARAWAK (IPU - 172)**
- 22) Sarikei, SARAWAK (IPU - 179)**
- 23) Tangkak, JOHOR (IPU - 156)**
- 24) Johan Setia, SELANGOR (IPU - 157)**
- 25) Politeknik Kota Kinabalu, SABAH (IPU - 156)**

Berdasarkan rekod pemantauan JAS pada jam 1.00 tengah hari, 5 September 2026, sebanyak enam (6) kawasan di Sarawak, iaitu IPD Serian (IPU 287), Kuching (IPU 267), Samarahan (IPU 242), Samalaju (IPU 202), Sri Aman (IPU 251) dan Bintulu (IPU 201), mencatatkan bacaan pada tahap sangat tidak sihat. Beberapa kawasan lain di Sarawak turut merekodkan bacaan pada tahap tidak sihat.

Keadaan ini berlaku dalam persekitaran cuaca kering yang berterusan di sebahagian Rantau Selatan ASEAN. Berdasarkan laporan ASEAN Specialised Meteorological Centre (ASMC) pada 4 September 2026, sebanyak 139 titik panas dikesan di Kalimantan, 138 di Sumatera dan 16 titik panas di Malaysia, iaitu 5 di Sabah, 9 di Sarawak dan 2 di Terengganu. ASMC turut melaporkan jerebu sederhana hingga

tebal diperhatikan bergerak ke arah timur laut dari Kalimantan ke beberapa kawasan di Sarawak, Sabah dan Brunei. Kepulan asap sederhana hingga tebal turut diperhatikan di Kalimantan Utara dan Kalimantan Timur serta bahagian tengah dan selatan Sumatera. Jerebu sederhana turut diperhatikan di Singapura, bahagian selatan Semenanjung Malaysia dan bahagian timur Jawa.

TINDAKAN JAS DIPERKUKUH

Jawatankuasa Pengurusan Bencana Sarawak (SDMC) sedang memantau secara dekat situasi jerebu di seluruh Sarawak, khususnya bacaan Indeks Pencemar Udara (IPU) di Serian. Pemantauan meliputi status kualiti udara, keadaan cuaca, titik panas dan pergerakan jerebu bagi menilai perkembangan situasi serta memastikan tindakan sewajarnya dapat diambil.

Dalam masa yang sama, Jabatan Alam Sekitar (JAS) turut menyediakan pelaporan trend kualiti udara di Serian setiap jam kepada SDMC bagi membolehkan perkembangan bacaan IPU dipantau dan dinilai dari semasa ke semasa. Maklumat ini penting dalam mengenal pasti perubahan tahap kualiti udara dan menyokong tindakan serta penyelarasan bersama agensi berkaitan mengikut perkembangan situasi.

Jabatan juga mempertingkatkan pemantauan dan rondaan di kawasan berisiko termasuk hutan, tanah gambut, tapak pelupusan sampah, kawasan pertanian dan perladangan, kawasan industri serta lokasi lain yang berpotensi menjadi punca pembakaran terbuka. Sebarang sumber pembakaran terbuka atau pencemaran yang dikenal pasti akan disiasat dan tindakan penguatkuasaan akan diambil dengan tegas mengikut peruntukan undang-undang serta bidang kuasa JAS.

.

Pada masa yang sama, JAS akan terus memantau bacaan IPU, titik panas dan perkembangan jerebu rentas sempadan sebagai input kepada penilaian situasi dan penyelarasan tindakan pengurusan jerebu di peringkat daerah, negeri dan kebangsaan.

JAS juga menegaskan bahawa pihak industri hendaklah memastikan pelepasan udara daripada punca utama dikurangkan bagi kawasan yang mencatatkan bacaan IPU melebihi 300, selaras dengan keperluan kawalan pencemaran dan tanggungjawab pihak industri dalam membantu mengurangkan tekanan terhadap kualiti udara.

TINDAKAN SELARAS PTJK

Tindakan JAS dilaksanakan secara bersepadu selaras dengan PTJK yang menetapkan peranan pelbagai agensi berdasarkan tahap dan perkembangan situasi jerebu. Antara mekanisme yang digariskan ialah pengaktifan Jawatankuasa Pengurusan Bencana oleh NADMA apabila:

- bacaan IPU melebihi 150 selama lebih 24 jam;
- penghentian aktiviti luar bilik darjah apabila IPU melebihi 100;
- penutupan sekolah, tadika dan taska apabila IPU melebihi 200; dan
- pelaksanaan Operasi Pembenihan Awan tertakluk kepada kehadiran awan dan keadaan cuaca yang sesuai apabila bacaan IPU melebihi 150 selama lebih 24 jam.

JAS akan terus mengemukakan maklumat berkaitan perkembangan situasi, hasil pemantauan, rondaan, OMPT dan tindakan penguatkuasaan secara berkala mengikut mekanisme pelaporan yang ditetapkan. Ini bagi memastikan perkembangan situasi dapat dinilai secara berterusan dan tindakan sewajarnya dapat diselaraskan di semua peringkat.

Dalam keadaan semasa, JAS tidak akan berkompromi terhadap sebarang pembakaran terbuka yang dikenal pasti berpunca daripada aktiviti manusia, khususnya sekiranya aktiviti tersebut menyumbang kepada kemerosotan kualiti udara. Tindakan pencegahan, pemeriksaan, siasatan dan penguatkuasaan akan diteruskan berdasarkan bukti serta bidang kuasa yang diperuntukkan kepada JAS.

ORANG RAMAI DIMINTA BEKERJASAMA

JAS menyeru orang ramai supaya tidak melakukan pembakaran terbuka, khususnya ketika keadaan cuaca panas dan kering serta kualiti udara berada pada tahap yang tidak sihat hingga berbahaya.

Orang ramai juga diminta supaya tidak membenarkan tanah atau premis milik mereka dimasuki atau dicerobohi oleh pihak yang tidak bertanggungjawab sehingga menyebabkan berlakunya pembakaran terbuka.

Selaras dengan Akta Kualiti Alam Sekeliling (Pindaan) 2024, kesalahan pembakaran terbuka boleh dikenakan denda minimum RM25,000 hingga RM1,000,000, atau penjara sehingga lima tahun, atau kedua-duanya. Kompaun sehingga 50 peratus daripada denda maksimum juga boleh dikenakan bagi setiap kesalahan.

Orang ramai diminta segera melaporkan sebarang kejadian kebakaran atau pembakaran terbuka kepada Jabatan Bomba dan Penyelamat Malaysia melalui talian 999 atau JAS melalui talian bebas tol 1-800-88-2727 bagi membolehkan tindakan segera diambil.

Bacaan IPU terkini setiap jam boleh dirujuk melalui Sistem Pengurusan Indeks Pencemar Udara (APIMS) JAS atau aplikasi rasmi MyJAS EQMS. Orang ramai juga dinasihatkan supaya mengikuti arahan dan nasihat kesihatan yang dikeluarkan oleh Kementerian Kesihatan Malaysia.

HAJAH AZURI AZIZAH BINTI HAJI SAEDON
TIMBALAN KETUA PENGARAH (PEMBANGUNAN)
5 SEPTEMBER 2026



Peta Jerebu Serantau Yang Dikeluarkan Oleh ASMC Pada 4 September 2026

